



ÁLVARO VILA ARAUJO, voceiro do Grupo Provincial Socialista da Deputación de Ourense, en base ao previsto na Lei de Bases Reguladora do Réxime Local, ó artigo 91 e 97, entre outros, da Regulación de Organización, Funcionamento e Réxime Xurídico das Entidades Locais e o Regulamento desta corporación presenta unha **MOCIÓN PARA A APERTURA DUNHA LIÑA DE AXUDAS REGULAR, AMPLA E CONSECUENTE DIRIXA AO SECTOR AGROPECUARIO PROVINCIAL**.

A crise do ramo agropecuario á que estamos a asistir non ten unha única causa, podendo ser obxecto de múltiples diagnósticos. Cada chanzo da cadea (produtores, industria, distribución e mesmo transporte) defende o seu particular rol, outorgando a prioridade a uns factores sobre o resto na listaxe de andazos e culpables que albiscan tralo murchar do sector, que non só se atopa en pe de guerra no Estado español, senón tamén no resto de Europa. No que si hai coincidencia é na consideración de que se trata dun problema certamente complexo, que non se pode -nin se debe- simplificar na busca de inimigos fáciles, de cabezas de turco, e que de ningún xeito é limitábel a un ou a uns poucos actores, ora institucionais ora grandes distribuidoras.

Os argumentos dos contestatarios son múltiples: 1) algúns arremeten contra a Política Agraria Común (PAC), a súas enormes cargas burocráticas e o cumprimento de certas directrices para garantir a seguridade alimentaria, a prosperidade das zonas rurais e do sector, e a sustentabilidade medioambiental; 2) outros inciden na necesidade de prezos xustos, co obxectivo de que os custos de produción sexan inferiores ao importe de venda de produtores; 3) o groso deles tamén esixen reformas en profundidade dos seguros agrarios para mellor dar cobertura ás novas condicións xeradas polo cambio climático; 4) aqueloutros que abundan na urxencia de atallar as consecuencias dunha xeopolítica mundial axitada da Ucraína ao Mar Vermello; ou 5) os que apelan a limitar os acordos chamados a incrementar o comercio internacional.

As principais asociacións do Estado, como a Asociación Agraria de Xoves Agricultores (ASAJA, nas súas siglas en español), a Coordinadora de Organizacións de Agricultores e Gandeiros (COAG) e a Unión de Pequenos Agricultores e Gandeiros (UPA); pero tamén as galegas Unións Agrarias (UUAA), Sindicato Labrego Galego (SLG) e Asociación Agraria de Galicia (Asaga), entre outras, reclaman a posta en marcha dun «plan de choque» para mellorar substancialmente as condicións do ramo. As devanditas organizacións esixen medidas tanto a nivel da Unión Europea (UE), coma do Estado español e do goberno da Xunta de Galicia, non diferindo de mais as súas reivindicacións coas dos seus homólogos europeos alén das razóns propias e particulares do sistema produtivo español e galego.

Actividades agrícolas e gandeiras son nomeadamente senlleiras na provincia de Ourense. A última actualización do Instituto Galego de Estatística (IGE) apunta a que no terceiro trimestre de 2023 o peso do sector primario galego acadou o 4,6% do PIB, sendo o peso do ramo en Ourense dun 5,2% no 2020 (fronte ao 12,6% de Lugo, 3,8% da Coruña e 2,9% de



Pontevedra). Por riba do sector da construción (5%) e aínda que superado por industria (18,1%) e servizos (62,4%), resulta palpábel que o sector agropecuario ten un impacto específico na nosa provincia, xa que contribúe a estruturar o territorio e xera riqueza e emprego en zonas con poucas alternativas económicas, erixíndose de paso en activo de primeira orde na conservación do medio ambiente.

Sen esquecer o peso do minifundismo nunha provincia con máis de 3,6 millóns de parcelas rexistradas, o Censo Agrícola de 2020 da conta da existencia en Ourense baixo titularidade de persoas físicas ou diferentes formas xurídicas de 13.190 explotacións agrícolas e 1.559 explotacións gandeiras. Até un 4,1% de traballadores en Ourense estaba ocupado no sector primario durante o terceiro trimestre de 2023, segundo o Instituto Nacional de Estadística (INE). O Informe do mercado de traballo na provincia de Ourense 2022 elaborado polo Servizo Público de Emprego Estatal (SEPE) da conta dun total 4.576 afiliados á Seguridade Social no sector da agricultura, gandería e silvicultura, rexistrándose entre xaneiro e xullo de 2023 a firma de 1.386 contratos.

A sustentabilidade das explotacións agrícolas e gandeiras pasa por alcanzar un grao de rendibilidade suficiente que, a miúdo, require do empurre dos poderes públicos. É habitual que outras deputacións do Estado dispoñan de subvencións consecuentes para axudar aos seus respectivos sectores primarios. Ocorre en Alaba ou Biscaia, ou en Málaga, por citar dous exemplos, pero tamén en Pontevedra, unha provincia galega gobernada polo PP onde o peso e impacto do agrogandeiro é moi inferior ao de Ourense. Non é sen tempo que a Deputación de Ourense se erixa en parte da solución da crise actual, dea un paso adiante e cristalice o seu compromiso coa sustentabilidade e modernización do sector primario para mellorar a viabilidade das explotacións agropecuarias e a súa competitividade, propiciando unha mellora substancial na calidade de vida de profesionais e traballadores do ramo.

Por todo o exposto o Grupo Provincial Socialista presenta as seguintes **PROPOSTAS DE ACORDO**:

PRIMEIRA.- Que a Deputación de Ourense poña en marcha unha exhaustiva auditoría do sector primario da provincia para acadar un coñecemento certo da realidade do ramo e poder elaborar un acaído plan estratéxico de programas e axudas, mellor coordinar con outras instancias autonómicas, estatais e comunitarias que tamén interveñen no ramo, e ser quen de deseñar políticas acaídas susceptibles de xerar as sinerxías e dinámicas necesarias para a salvagarda e reforzamento do agrogandeiro ourensán.

SEGUNDA.- Que a Deputación de Ourense implemente unha liña de subvencións públicas regular, ampla e consecuente, en réxime de concorrència competitiva, para empresas e autónomos da provincia que atenda a unha pluralidade de aspectos vencellados co sector primario como o emprendemento e á dixitalización das explotacións, pero tamén cultivos e técnicas de produción, regadíos, maquinaria agrícola e gandeira, laboratorio e análise do chan e dos animais, agricultura ecolóxica, sanidade vexetal e animal, identificación e rexistro



Grupo Provincial Socialista

Rúa Progreso, 32 – 2º andar
32003 Ourense
Tlf. 988 385 203 Tlf/Fax. 988 385 178
CIF: G32244345

de cultivos e animais, produción agrícola e gandeira, seguridade alimentaria, xestión de subproductos non dedicados a consumo humano e cooperativismo.

TERCEIRA.- Que a Deputación de Ourense abra unha liña específica de subvencións públicas, en réxime de concorrència competitiva, dirixidas a cooperativas agrogandeiras dada a súa importancia no desenvolvemento do sector agropecuario provincial para a comercialización, transformación e valorización das producións, a formación técnica e asesoramento para investigación e innovación tecnolóxica, o uso de novas tecnoloxías, enerxías renovables e o fomento do aforro enerxético, así como para a adquisición de terreos e investimentos en maquinaria agrícola, equipamentos ou construcións.

CUARTA.- Que a Deputación de Ourense active un mecanismo de seguimento e avaliación do impacto das axudas, que teñen como obxectivo a adaptación, modernización e mecanización das explotacións para reducir os custos indirectos e mellorar a produtividade, e a sustentabilidade ambiental, amais de incrementar a calidade das producións e reforzar a seguridade alimentaria. Este mecanismo debe atender ao cumprimento das metas de reorientación da produción ás demandas do mercado e á diversificación de actividades agrícolas e gandeiras, redundando os investimentos consentidos na mellora dos resultados das explotacións agropecuarias e condicións de vida dos profesionais do ramo.

En Ourense, a 8 de febreiro de 2024.

Asinado: Álvaro Vila Araujo

SR. PRESIDENTE DA DEPUTACIÓN PROVINCIAL DE OURENSE